



Attaveqarnermut, Avatangiisinut Aatsitassanullu Naalakkersuisoq
Medlem af Naalakkersuisut for Boliger, Infrastruktur og Trafik

Inatsisartuni ilaasortaq Kristian Jeremiassen, Siumut
-/Maani

Ummannami Ilulissanilu umiarsualivinni alliliinissamut pilersaarutit pillugit § 36 naapertorlugu apeqquutit.

13.10.2009

Asasara Kristian Jeremiassen,

Postboks 909
3900 Nuuk
Oq/tel +299 34 54 00
Fax +299 34 54 10
aan@gh.gl
www.nanoq.gl/aan

Inatsisartut suleriaasianni § 36, imm. 1 naapertorlugu apeqquuteqaatit
Naalakkersuisut tiguaat.

Apeqquut:

” Ummannami Ilulissanilu umiarsualiviup ukiuni kingullerni atornerqarnerata
annertusiartornera pissutigalugu allilerneqarnissaat pisariaqartinneqarpoq,
taamaattumik pisariaqartitsineq aallaavigalugu apeqquutit imaattut
saqqummiutissavakka:

- Ummannami Ilulissanilu talittarfiit allilerneqarnissaannik Naalakkersuisut
pilersaaruteqarpat?
- Naalakkersuisunit alliliisoqarnissaa pilersaarutigineqarsimappat, qaqugu
alliliinissat pinissaat pilersaarutaava?
- Ummannami Ilulissanilu talittarfeqarnikkut alliliinissanik Naalakkersuisut
pilersaaruteqartoqanngippata, suut tunngavilersuutaappat
pilersaaruteqannginnermut?”

Akissut:

Ummannami Ilulissanilu umiarsualivinni pissutsit pillugit saaffiginnissutinnut
qujanaq, taamaalillungami pissutsit maanna atuuttut tunuliaqutaat pillugit
nassuiaanissamut, tamatumalu peqatigisaanik suliniutit ingerlareersut pisussallu
pillugit ilinnut ilisimatitsissuteqarnissamut periarfissinneqarpunga.

2006-imi ukiakkut ataatsimiinnermi taamani inatsisartuusut “2006-imi
umiarsualivinnik annertusaaneq pillugu nassuiaat” akuersissutigaat, tassanilu
Kalaallit Nunaanni umiarsualiviit annerit annertusarneqarnissaat
pingaarnerutinneqarpoq. Suliassanut tulleriiaarneqartunut ataasiakkaanut
aningaasaliinissamut sanaartukkat ilaasa atuinikinneruffiullutik
naammassineqarnissaat imaluunniit taamaativinneqarnissaat tunngavigineqarpoq.
Ukiuni kingullerni sanaartukkanut taamaatinneqarsinnaasunut imaluunniit
atuinikiffiunerullutik naammassineqarsinnaasunut aningaasaliisoqarsimanninnera
maannakkorpiaq atuuppoq.

Erseqqissaatigissavarali Ilulissani Uummannamilu umiarsualiviit Nunap Karsiani akissaqarneq tunngavigalugu ingerlaavartumik aserfallatsaaliorneqartarmata nutarterneqartarlutillu. Maannakkorpiaq Ilulissani quersuarmi betonimik nutaamik qallersuisoqarpoq, umiarsuarnut Imapik ikaarlugu angalasartunut talittarfik qallersorneqarpoq, kiisalu pladet sisaat, taliffarfiup qaavata sinaakkutaa qisuillu nungullarnaveeqqutit iluarsaanneqarput. Kiisalu Ilulissat Uummannallu umiarsualiviini reeferinut ikkuffiit ilaneqarnissaat pilersaarutigineqarpoq.

Kalaallit Nunaanni umiarsualiviit angisuut kisimik aallunneqarnissaat naammangitsoq eqqumaffigivara, aammalu nunatsinni takornariaqarnerup annertusineranut malugisatsinnut atatillugu umiarsualiviit ineriartortitsinissamik pisariaqartitsinerat paasiniaarlugu misissuisoqartariaqarnera eqqumaffigaara. Taamaattumik paasiniaanissaq taamaattoq siunissamut ungasissumut assartuinnermut politikki, aammattaaq umiarsualivinnik ilaatitsiviususaaq pillugu sulinissamut, assartuinnermut ataatsimiititaliassamit suliarineqartussamut ilaatinneqassaaq.

Taamaattumik umiarsualivinnik alliliinissamut nutarterinissamullu isumaliutaasut aamma assartuinnermut isumalioqatigiissitap suliassaanut ilanngunneqassapput. Assartuinnermut isumalioqatigiissitap 2009-mi ukiakkut pilersinneqarnissaa, suliaminillu 2010-mi juunimi naammassinninnissaa naatsorsuutigineqarpoq.

Tamanna pissutigalugu Ilulissani Uummannamilu umiarsualivinnik alliliinissamut Naalakkersuisut aalajangersimasunik pilersaaruteqanngillat, kisiannili Nunap Karsiata aningaasaqarnikkut pisinnaasai tunngavigalugit umiarsualiviit nakkutigineqarput, aserfallatsaaliarneqarlutik nutarterneqarlutillu. Taakku saniatigut Kalaallit Nunaanni umiarsualivinni tamani ineriartortitsinissaq pillugu isumaliutersuutit assartuinnermut ataatsimiititaliap suliaanut ilaatinneqassapput.

Ikinngutinnersumik inuulluaqqusillunga

Jens B. Frederiksen